

KERATAN AKHBAR

TARIKH : 15 FEBRUARI 2023

AKHBAR : ASTRO AWANI

MUKA SURAT : <https://www.astroawani.com/berita-bisnes/inisiatif-pendapatan-rakyat-ipr-dilancar-pada-26-feb-rafizi-406696?amp=1>

Inisiatif Pendapatan Rakyat IPR dilancar pada 26 Feb – Rafizi



Menurut Menteri Ekonomi Rafizi Ramli, IPR sebahagian daripada dasar ekonomi besar membabitkan pendapatan rakyat yang akan dibentangkan kepada peringkat tertinggi kerajaan. - Fail/BERNAMA

KUALA LUMPUR: Kementerian Ekonomi bakal melancarkan Inisiatif Pendapatan Rakyat (IPR) pada 26 Februari depan dalam usaha untuk meningkatkan gaji rakyat selaras dengan kenaikan kos sara hidup.

Menurut Menteri Ekonomi Rafizi Ramli, langkah itu sebahagian daripada dasar ekonomi besar membabitkan pendapatan rakyat yang akan dibentangkan kepada peringkat tertinggi kerajaan.

“Sasaran pertama IPR adalah golongan miskin tegar dan keluarga B40 di seluruh negara.

“Kementerian Ekonomi akan terus mengimbangi tumpuan untuk menstrukturkan ekonomi negara di peringkat makro dan sektor-sektor strategik dengan keperluan ekonomi rakyat berhubung kos sara hidup dan gaji yang lebih baik,” katanya dalam sidang media pada Rabu.

Tambah beliau, dasar-dasar membabitkan gaji rakyat akan dikemukakan kepada Majlis Tindakan Ekonomi Negara (MTEN), iaitu badan penasihat ekonomi tertinggi negara yang dipengerusikan oleh Perdana Menteri, Datuk Seri Anwar Ibrahim.

“Ini supaya dasar negara dapat diselaraskan ke arah satu sasaran pertumbuhan gaji yang menyeluruh kepada semua golongan pekerja.

“Kementerian Ekonomi akan bekerjasama dengan kementerian lain dan ini sebahagian daripada semakan dasar yang kami akan buat untuk melihat bagaimana untuk menetapkan beberapa dasar baru ke arah pertumbuhan gaji yang bukan sahaja melibatkan pekerja bawahan,” ujarinya.

MTEN dijadual mengadakan mesyuarat pertama pada Mac depan.